

In giuven autur da Berna fa strada

«Lanz» è frestg e «frech» – da cussegliar da leger

DA CLAUDIA CADRUVI / ANR

■ **Strusch finì la scola da scripturs a Bienna po Flurin Jecker gia festivar in success nunditg. Ses emprim cudesch «Lanz» legian ins sco da baiver aua ed il pli gugent en in dai atras.** Lanz è in mat da 14 onns. Aposta pervi da sia Lynn adorada s'annunzia el per il curs da scriver blogs en l'emna da project. Da ses ami sa el che Lynn ha tschernì quest curs. Cura che Lanz vegn il glindesdi dad isch en, na po el betg crair quant tgutg ch'el è stà: Lynn n'è nagliur perpes ed enstagl tanscha Gilgen, il scolast ch'el na po betg star ora, ad el il maun. L'emprim fai la chaja ad el da scriver in blog, ma la finala – ed era perquai ch'il scolast sinceresch ch'ins na stoppia segir betg publitgar insatge – cumenza Lanz cun «Mein Blog bei Herrn Gilgen».

Lanz scappa si Mustér

Lanz raquinta da sia trumpada che Lynn n'è betg vegnida, che ses ami l'ha forsà cugliunà, da sia relaziun cun ils geniturs che na vivan betg pli ensemen, dal chiffen, da ses quartier ed in summa da sia vita. El scriva cun ina sinceradad ch'è mo pussaivla perquai ch'el sa franc e segir che nagin legia tut quai. La mesemna, Lynn è en il fratemp tuttina vegnida en il curs, supplitescha Gilgen vonzai ses scolars da preleger ord il blog. In blog saja la finala insatge public e «vus faschais gea era adina il posten tut».

Nagin en classa less propi. E Lanz pir da dretg betg. A la fin da l'ura fa il scolast star enavos Lanz e di ad el ch'el stoppia l'auter di en mintga cas preleger. Lanz va a chasa, pachatescha ses satgados e fui si Mustér tar ses parents. En la segunda part che Lanz scappa a Mustér tar aug, onda e cusrins, perda il cudesch empau da ses schlantsch. L'emp-



Flurin Jecker impressiuntescha critichers e recensents cun ses début «Lanz».

MAD

prima part persvada dentant. Sco lectur pudess ins leger anc bler dapli ed ins vegn tschiffà da quest Lanz – il num è dal reminent la scursanizium per Lancelot, ina figura litterara ch'è medemamain pers en ina amur in pau delicata – che sa dat anoravers cool, ma less per nagin pretsch tradir insatge da ses patratgs interns. Jecker raquinta frestg e frech e cun ina tonalitat che corresponda al raquint.

El sa serva era da singuls plets dialectals che tunan franc sco sch'els derivassan d'in concept d'in scolast, pia in med per sutlingiar il slang giuvenil. Ma fiss quai propi necessari? Sch'ins legia per la dieschavla giada il pled «gleich» empè da «trotzdem», tuni insacuras in pau isà. I croda si che absolvents da la scola per scripturs a Bienna sa servan gugent dad expressiuns dialectalas sco med stilistic.

Adina na reusseschi dentant betg d'integrar il dialect a moda lingiera en la lingua da scrittira tudestga.

Discurra sursilvan

Flurin Jecker ha 27 onns, è creschì si a Berna, ha studegià biologia e lavura sco schurnalist independent. L'onni passà ha el terminà la scolaziun a l'institut litterar svizzer a Bienna. Il roman «Lanz» è stà sia

lavor da finizium. Cun sia mamma ha Jecker da pitschen ensi adina discurre sursilvan, ma scriver scriva el mo per tudestg.

La mesemna ils 23 d'avust, a las 20.00 prelegia Flurin Jecker a Val S. Pieder en la chasa Adula.

Flurin Jecker, «Lanz», Nagel & Kimche, 124 paginas, circa 20 francs, Minca, 2017.